



Մ Ա Յ Ր Ա Թ Ո Ռ Ո Ւ Մ

Սեպտեմբերի 28-ին, շաբաթ, «Տօն Սրբոյն Գէորգայ քաջամարտիկ զօրավարին»:

Երեկոյան ժամերգութիւնից հետո, Վեհափառ Հայրապետի բարձր նախագահութեամբ, կատարվեց հոգեհանգստւան պաշտոն երջանկահիշատակ Գևորգ Զ Կաթողիկոսի շիրիմի վրա, մասնակցութեամբ Մայր Աթոռի ողջ միաբանութեան:

* * *

Սեպտեմբերի 29-ին, կիրակի, «Տօն Վարազայ Ս. Խաչի»:

Մայր Տաճարում տոնի առթիւ պատարագեց գերաշնորհ Տ. Ասողիկ եպիսկոպոս Ղազարեանը, որը և քարոզեց Վարագա Ս. Խաչի տոնի ազգային-եկեղեցական նշանակութեան մասին ընդհանրապես և խաչի խորհրդի մասին մասնավորապես:

Ժամը 3-ին, Վեհարանի սեղանատանը, տրվեց ողջերթի ճաշկերութիւն Վեհափառ Հայրապետի արտասահման կատարելիք ուղևորութեան առթիւ:

Ճաշկերութիւն ներկա էին Մայր Աթոռի միաբանութեանը, Գերագոյն Հոգևոր Խորհրդի և Վերստուգի հանձնաժողովի անդամները, հյուրաբար Մայր Աթոռում գտնվող հայտնի հայագետ պրոֆ. Յրեղերիկ Ֆեյդին, նույն օրը Փարիզից Մայր Աթոռ ժամանած երաժշտագետ Արա Պարթևեանը իր տիկնոջ հետ և այլ հրավիրյալներ:

Ճաշկերութիւն ներկա էին նաև Հայկական ՍՍՌ Մինիստրների սովետին առընթեր Հայ Եկեղեցու գործերի խորհրդի նախագահ պր. Կ. Դալլաքեանը և տեղակալ պր. Ս. Հովհաննիսյանը:

Ճաշկերութիւն ժամանակ Վեհափառ Հայրապետին և նրա ուղևորութեան շքախմբի անդամներին բարի ճանապարհ մաղթեցին Հայկական ՍՍՌ Մինիստրների սովետին առընթեր Հայ Եկեղեցու խորհրդի նախագահ պր. Կ. Դալլաքեանը, Գերագոյն Հոգևոր Խորհրդի անդամ պրոֆ. Ա. Առաքելեանը, հյուրերից պրոֆ. Յ. Ֆեյդին, երաժշտագետ Ա. Պարթևեանը և «Էջմիածին» ամսագրի խմբագիր Ա. Հատիտեանը:

Վեհափառ Հայրապետը, խոսք առնելով, շնորհակալութիւն հայտնեց արտահայտված ջերմ և սրտագին բարեմաղթութիւնների համար և անդրադարձավ իր երրորդ ուղևորութեան նպատակների և ծրագրերի մասին:

* * *


Սեպտեմբերի 30-ին, երկուշաբթի, առավոտյան ժամը 10-ին Մայր Տաճար այցելեց Պակիստանի երգի և պարի պետական ասամբլը:

Վեհարանում հյուրերին ընդունեց Վեհափառ Հայրապետը և զրույց ունեցավ նրանց հետ:

* * *

Հոկտեմբերի 2-ին, չորեքշաբթի, երեկոյան ժամը 6-ին, Վեհափառ Հայրապետը իր շքախմբով մեկնեց Մոսկվա՝ արտասահման ուղևորվելու համար:

Երևանի օդանավակայանում Վեհափառ Հայրապետին և իր շքախմբի անդամներին



ՓՂՈՍԿՐԹԱ ԱՐԾԱԹՅԱ ՀԱՅՐԱՊԵՏԱԿԱՆ ԳԱՀ,
ՆՎԵՐ ԱՄԵՆԱՅՆ ՀԱՅՈՑ ՀԱՅՐԱՊԵՏԻՆ ԻՐԱՆԱ-ՀՆԴԿԱՍՏԱՆԻ ԹԵՄԻ ԿՈՂՄԻՑ:

բարի ճանապարհ մաղթեցին Մայր Աթոռի միաբանությունը, Գերագույն Հոգևոր Խորհրդի և Վերստուգիչ հանձնաժողովի անդամները, Երևանի եկեղեցիների քահանայից դասը, պաշտոնական անձինք և այլ հյուրեր:

Վեհափառ Հայրապետին ճանապարհեցին նաև Հայկական ՍՍՌ Մինիստրների սովետին առընթեր Հայ Եկեղեցու գործերի խորհրդի նախագահ պր. Կ. Դալլաքյանը և տեղակալ պր. Ս. Հովհաննիսյանը:

* *

Հոկտեմբերի 6-ին, կիրակի, Մայր Տաճարում իր վարդապետական անդրանիկ պատարագը մատուցեց հոգեշնորհ Տ. Նարեկ վարդապետ Շաքարյանը:

Հավարտ սուրբ պատարագի, իջման Ս. Սեդանի առաջ, կատարվեց Հայրապետական մաղթանք՝ Վեհափառ Հայրապետի գահակալության 8-րդ տարեդարձի բարեբաաստիկ առթիվ:

Սուրբ պատարագին ներկա էին մեծ թվով ամերիկահայ ուխտավորներ:

* *

Հոկտեմբերի 12-ին, շաբաթ, «Տօն Սրբոց Թարգմանչաց վարդապետացն մերոց»:

Մայր Տաճարում սուրբ պատարագ մատուցեց արժանապատիվ Տ. Հակոբ քահանա Հակոբյանը:

* *

Հոկտեմբերի 12-ին, շաբաթ, Միլանոյից Մայր Աթոռ ժամանեց հայտնի մտավորական դոկտ. Ա. Սրապյանը:

* *

Հոկտեմբերի 13-ին, կիրակի, Մայր Տաճարում պատարագեց և քարոզեց հոգեշնորհ Տ. Գրիգոր վարդապետ Եղիայանը «Որք զժողովրդս Հոգւոյն արբին և ընդ ժամանակս երգեցին զեղանակաւոր երգս շարականաց» ընթերցանով:

